

ՍՍՀՄ Գերագույն սովետի նախագահության Հ Ր Ա Մ Ա Ն Ա Գ Ի Ր Ը

Ադրբեջանական ՍՍՀ Լեռնային Ղարաբաղի Ինքնավար Մարզում կառավարման հատուկ ձև սահմանելու մասին

Լեռնային Ղարաբաղի Ինքնավար Մարզում և նրա առընչությանը ազգամիջյան հարաբերությունների շարունակվող լարվածության կապակցությամբ, նպատակ ունենալով կանխել դրանց հետագա սրումը և կայունացնել իրադրությունն այդ ռեգիոնում, հաշվի առնելով Ադրբեջանական ՍՍՀ-ի և Հայկական ՍՍՀ-ի կուսակցական ու պետական մարմինների, ինչպես նաև Ազգությունների սովետի հանձնաժողովի առաջարկությունները, ՍՍՀՄ Գերագույն սովետի նախագահությունը, այդ հարցը քննության առնելով Ադրբեջանական ՍՍՀ Գերագույն սովետի նախագահության հետ, ՍՍՀՄ սահմանադրության 119-րդ հոդվածի 14-րդ կետին համապատասխան որոշում է.

1. Լեռնային Ղարաբաղի Ինքնավար Մարզում ժամանակավորապես սահմանել կառավարման հատուկ ձև, պահպանելով Լեռնային Ղարաբաղի՝ որպես Ադրբեջանական ՍՍՀ-ի կազմում ինքնավար մարզի, ստատուսը:

Կազմել Լեռնային Ղարաբաղի Ինքնավար Մարզի Հատուկ կառավարման կոմիտե՝ ընկ. Ա. Ի. Վոլսկու նախագահությամբ:

Դադարեցնել Լեռնային Ղարաբաղի Ինքնավար Մարզի քսաներորդ գումարման ժողովրդական դեպուտատների սովետի լիազորությունները մինչև սովետի նոր կազմի ընտրությունների անցկացումը:

2. Սահմանել, որ Լեռնային Ղարաբաղի Ինքնավար Մարզի Հատուկ կառավարման կոմիտեն ենթարկվում է անմիջականորեն ՍՍՀ Միության պետական իշխանության և կառավարման բարձրագույն մարմիններին, լրիվ ծավալով օժտված է ինքնավար մարզի ժողովրդական դեպուտատների սովետի և նրա գործադիր կոմիտեի լիազորություններով, իսկ Կոմիտեի նախագահը՝ ժողովրդական դեպուտատների մարզային սովետի գործադիր կոմիտեի նախագահի իրավունքներով ու պարտականություններով:

Հիշյալ Կոմիտեի վրա դնել Լեռնային Ղարաբաղի Ինքնավար Մարզի պետական իշխանության և կառավարման տեղական մարմինների ղեկավարումը, ինչպես նաև նրան հանձնել ժողովրդական դեպուտատների մարզային սովետի գործադիր կոմիտեի ապարատը՝ որպես աշխատանքային մարմին:

3. Սահմանել, որ Լեռնային Ղարաբաղի Ինքնավար Մարզի տարածքում գտնվող միութենական և հանրապետական ենթակայության ձեռնարկությունները, հիմնարկություններն ու կազմակերպությունները, ինչպես նաև նրանց մասնաճյուղերը, արտադրամասերն ու մյուս կառուցվածքային ստորաբաժանումները սույն հրամանագրի գործողության ժամանակամիջոցում, այն հարցերում, որ կորոշի ՍՍՀՄ Մինիստրների խորհուրդը՝ հաշվի առնելով Ադրբեջանական ՍՍՀ Մինիստրների խորհրդի կարծիքը, ենթարկվում են Կոմիտեին:

Մասնովի, ռադիոյի և հեռուստատեսության, մասսայական ինֆորմացիայի մյուս միջոցների օրգանները, հրատարակչությունները, պոլիգրաֆիական ձեռնարկությունները, ներքին գործերի մարմինները, ինչպես նաև մշակույթի, ժողովրդական կրթության, առողջապահության հիմնարկություններն ու ոչ արտադրական ոլորտի մյուս կազմակերպությունները, անկախ իրենց ենթակայությունից ու գերատեսչական պատկանելությունից, իրենց գործունեությունը իրականացնում են Կոմիտեի կամ նրա լիազորած անձանց անմիջական ղեկավարությամբ:

Լեռնային Ղարաբաղի Ինքնավար Մարզի տարածքում դատախազության ու դատարանների գործունեությունն իրականացվում է գործող օրենսդրության ու այն կարգի համաձայն, որ կսահմանեն համապատասխանաբար ՍՍՀՄ գլխավոր դատախազը, ՍՍՀՄ արդարադատության մինիստրությունը և ՍՍՀՄ գերագույն դատարանը:

4. Լեռնային Ղարաբաղի Ինքնավար Մարզի Հատուկ կառավարման կոմիտեին իրավունք տալ.

դադարեցնել Լեռնային Ղարաբաղի Ինքնավար Մարզի ժողովրդական դեպուտատների շրջանային, քաղաքային, գյուղական, ավանային սովետների, նրանց գործադիր և կարգադիր մարմինների լիազորությունները, ինչպես նաև նշանակել հիշյալ տեղական սովետների ընտրություններ և կազմակերպել դրանց անցկացումը:

դադարեցնել հասարակական կազմակերպությունների և ինքնագործ միավորումների՝ ՍՍՀՄ սահմանադրությանն ու օրենսդրությանը հակասող գործունեությունը կամ, անհրաժեշտության դեպքում, արձակել դրանք: Հանրապետական կամ ընդհանուր միութենական մարմիններ ունեցող նշված կազմակերպությունների ու միավորումների գրանցումը կամ արձակումը կատարվում է այդ մարմինների հետ համաձայնեցնելով:

անհրաժեշտության դեպքում պետական, տնտեսական և սոցիալ-կուլտուրական շինարարության հարցերի առթիվ առաջարկություններ ներկայացնել անմիջականորեն ՍՍՀՄ Գերագույն սովետի նախագահություն, ՍՍՀՄ Մինիստրների խորհուրդ, ՍՍՀՄ մինիստրություններ, պետական կոմիտեներ ու գերատեսչություններ:

5. Լեռնային Ղարաբաղի Ինքնավար Մարզի տարածքում ժամանակավորապես դադարեցնել «Պետական ձեռնարկության (միավորման) մասին» ՍՍՀՄ օրենքի 8-րդ հոդվածի 2-րդ, 3-րդ կետերի ու 5-րդ կետի երրորդ պարբ. և 7-րդ հոդվածի գործողությունը:

6. Ադրբեջանական ՍՍՀ Գերագույն սովետի նախագահությունը՝ ընդունել սույն հրամանագրից բխող համապատասխան որոշումներ:

7. Սույն հրամանագիրը կիրարկել 1989 թվականի հունվարի 20-ից:

ՍՍՀՄ Գերագույն սովետի նախագահության նախագահ՝

Մ. ԳՈՐԲԱՉՈՎ

ՍՍՀՄ Գերագույն սովետի նախագահության քարտուղար՝

Թ. ՄԵՆՔԵՇԱՅՎԻԼԻ